



wantok

Niuspepa bilong ol Papua Niugini stret

NESENEL

Namba 246

Bilong wik i stat long Sarere, 25 Novemba 1978

Prais 10t.

Yunaitet Pati wokim bris



Poto i kam long Turis Dipatmen

BASET 1979

Olgeta yia Minista bilong Fainens, em man i bosim olgeta wok mani bilong kantri, i mas sanap na givim ripot long kantri long olgeta mani. Na dispela ripot i no long ol mani kantri i bin winim pinis o i bin lusim pinis.

Nogat. Em i program i tok, bai kantri i laik winim hamas mani long yia i laik kamap, na em bai lusim hamas mani long olkain wok bilong en. Dispela kain ripot o program bilong mani, yumi save kolim baset.

Taim Minista bilong Fainens i save ritim dispela ripot long palamen oltaim em i mas toktok moa olsem wan aua stret. Dispela taim em i ritim pepa i gat 29 pes long en. Na sapos yumi tok tru, planti memba bilong palamen yet i no save tru long insait na mining bilong planti tok-tok insait long baset. Em i antap tumas long ol; em i popaia long ol. Na i wan-kain long ol manmeri nating i stap long ples.

Dispela baset Mista Barry Holloway i bin ritim dispela taim, em i bilong stat long Janueri 1979. Hia

mipela i givim sampela namba bilong en tasol. Ol pipel i no laik bai planti bikpela namba nating i kapsait antap long het na yau bilong ol. Wan wan manmeri i laik save tupela samting tasol: bai ol i kisim hamas mani long gavman, na bai ol i mas takis hamas long gavman. Orait, nau mipela i tokim ol. Na bihain, long wan wan Wantok niusepepa bai mipela i tok save long wan wan provins. Gavman i ting long mekim wanem kain wok long provins bilong ol, na em bai lusim hamas mani long dispela wok long yia 1979.

Nau yumi lukim sampela namba bilong mani bilong baset bilong 1979. Ol i tok olsem, kantri bai lusim K535.400.00 (moa olsem 535 milion kina). Na kantri bai winim K523.000.000 (523 milion kina). Sapos yu lukim olsem, bai yu painim Gavman i lusim K12 milion moa kina olsem em i winim. Olsem em i mas painim sampela we long winim dispela K12 milion kina, bai ol samting i stret.

Olsem na em i pasin bilong gavman bilong apim kain kain takis, o putim takis i hait insait long prais

bilong wan wan samting.

Gavman long dispela yia i tok em inap winim K264,000.000 (264 milion kina) long olkain takis. Planti dispela kain takis i karamapim bikpela kampani na olsem ol liklik man i no pilim.

Tasol dispela taim gavman i tok em bai bungim K7.500.000 (moa olsem 7 milion kina) long sampela nupela takis i hait insait long prais bilong bia na wain na sigaret. Na nau ol pasindia i mas putim K2 moa long flai long bikpela balus. Na ol sek bilong sek-buk bilong ol tu i gat takis inap 10t long wan wan sek. I gat takis long planti kain spesel kaikai i kam long ol ausait kantri. Yu no lukim; em i stap insait long prais pinis. I gat takis long ka na takis long winmani. Em i pasin bilong olgeta gavman bilong kamapim mani.

Mani i ranim kantri; mani bilong ol pipel i ranim kantri. Olsem na ol pipel i laik save bai hamas dispela mani i kam bek long ol. Long dispela yia gavman i makim

K126.000.000 long helpim wok long ol provins.

Mista Holloway i tok ol mani samting long kantri i ran gut; na planti arapela kantri i mangalim mipela. I tru, Australia i bikpela pren bilong mipela yet na i presen long K175,000.000 long dispela yia gen. Tasol isi isi dispela namba mani i go daun. Long yia 1972 moa olsem hap (60%) bilong baset mani i kam long Australia yet; tade em i 35% pesen tasol. Em i soim PNG isi isi i lainim long sanap long lek bilong em.

Ol prais bilong ol samting i no bin kalap i go antap tumas long yia 1978. Mista Holloway i tenkyu long ol leba yunion long wanem ol i stiaim gut ol wokman na ol i no bin straik planti na singaut oltaim long moa moa pe. Na long sampela ples tu prais bilong kaikai na buai samting i bin go daun.

Moa na moa pipel bilong PNG i putim moa mani long beng nau. I tru, bai prais bilong kopra na kopi i mas pundaun liklik - tasol em i samting nating.

Poto i kam long Turis Dipatmen



VOT

(i kam long pes 3)

man, na yupela i laik ol i ilektim nupela lida, em i samting bilong yupela. Yupela go traim. Mi hepi long wetim tokbek bilong ol pipel.

Tasol sapos yupela palamen i pret long votim nupela ileksen, orait, mobeta sampela yupela i go isi isi pastaim. Mi save pinis, em i wok bilong oposisen bilong sutim tok long gavman, long glasim tru olgeta wok bilong gavman. Tasol sapos yupela ol memba bilong palamen i laik bai ol pipel long ples i bilip liklik long dispela palamen na dispela kantri, sampela yupela i no ken wok tasol long pasim rot na pasim wok bilong gavman oltaim oltaim. Inap pinis nau. Mipela i laik go het na mekim wok gavman. Yupela i laik mipela i go het o nogat? Nau vot bilong yupela i ken autim tingting bilong yupela.

Ol i vot. Na 63 memba i yesa long Somare/Yunaitet Pati gavman, na 35 i egens.

wantok
Niusepepa Bilong ol Provins Melanesian

National weekly in
Melanesian Pidgin.

Editorial Offices:
P.O. Box 1982
Boroko

Phone: 25.2214
25.2552
Telex: NE 22213

Branch Offices:
Wewak
Phone: 86.2479

Wabag
P.O. Box 111
Phone: 57.1018

Advertising:
In P.N.G.
Penny Donald
Phone: 25.2214

In Australia:
Peter Halse Associates
King York House
32 York Street
Sydney (2000)
Phone: 29.7527
Telex: 21.409

Subscription Rate:
Annual: K8.00.

Akepa Miakwe (Unggal-Bena)
 Akoka Dol (Ijivitari)
 Billy Hai (Okapa)
 Bruce Jephcott (Madang)
 Clement Poye (Sinasin - Yonggamugi)
 Gabriel Bakani (Talisea)
 Galeva Kwarara (Rigo)
 Galopo Masa (Kandrian-Gloucestera)
 Gerega Pepena (Alotau)
 Gialmi Warena (Imbongu)
 Goasa Damena (Moresby)
 Jacob Lemeki (Samarai-Murua)
 James Moplo (Central)
 John Jaminan (Yangoru-Saussia)
 Joseph Aoa (Kairuku-Hiri)
 Josephine Abaljah (Moresby)
 Julius Chan (Namatanal)
 Justin Edimani (Esa'ala)
 Kala Swokin (Westen)
 Konia Dewe (Kundilawa)
 Koriam Urekit (Pomio)
 Louis Mona (Goilala)
 Iambakey Okuk (Chimbu)
 Mahuru Rarua-Rarua (Moresby)
 Mark Ipuia (Lagaip-Porgera)
 Mek Nugints (Baiyer-Mui)
 Nebare Kamun (Karimul-Nomane)
 Noel Levi (New Ireland)
 Opatio Rimoru (Usino-Bundi)
 Palale Eio (Koroba-Lake Kopiago)
 Paul Torato (Enga)
 Posu Ank (Mendi)
 Robert Yabara (Chuave)
 Sallias Atopere (Goroka)
 Sevese Morea (Moresby)
 Talu Bolt (North-Wahgi)
 Thomas Kavali (Jimi)
 Tom Amalu (Kompiani-Ambun)
 Waquo Golye (Kerowagi)
 Wallyato Clowes (Middle Fly)
 Warren Dutton (North Fly)
 Wiwa Korowi (Southern Highlands)
 Wokam Rem (Middle-Ramu)
 Yano Belo (Kagua-Erave)
 Zibang Zurecnuoc (Finschhafen)

Angmai Bilas (Madang)
 Anthony Anugu (South Bougainville)
 Aron Noalo (Kerema)
 Asimboro Ston (Ambunti-Dreklkir)
 Barry Holloway (Eastern Highlands)
 Boyamo Sali (Morobe)
 Caspar Anggua (Bogia)
 Christopher Sambre (Nuku)
 Dambali Habe (Komo-Margarima)
 Damien Kereku (East New Britain)
 Delba Biri (Gumine)
 Ebia Olewale (South Fly)
 Gai Duwabane (Daulo)
 Giri Yaru (Markham)
 Ibne Kor (Nipa-Kutubu)
 John Kaputin (Rabaul)
 John Momis (Bougainville)
 John Noel (Kiriwina-Goodenough)
 John Yaka (Kandep)
 Johnny Onzenga (Tewai-Slassi)
 Kare Maor (Sumkar)
 Kari Kitchens (West Sepik)
 Kingsford Dibela (Alotau)
 Lukas Waka (West New Britain)
 Mafuk Gaianda (Rai Coast)
 Martin ToVadek (Gazelle)
 Mathew Bendumb (Bulolo)
 Matiabe Yuwi (Tari)
 Michael Prondros (Manus)
 Michael Somare (East Sepik)
 Nagibo Seregi (Huon Gulf)
 Nahau Rooney (Manus)
 Neville Bourne (Menyama)
 Opai Kunangel (Angalimp - South Wahgi)
 Oscar Tammur (Kokopo)
 Parua Kuri (Del)
 Pato Kakarya (Wapenamanda)
 Pita Lus (Maprik)
 Palas Wingti (Hagen)
 Pundia Kange (Ialibu-Pangia)
 Raphael Bele (Central Bougainville)
 Raphael Doa (Western Highlands)
 Roy Evara (Kikori)
 Sam Tulo (Northern Bougainville)
 Silingi Kapalik (Nawae)
 Stephen Sio (Aitape-Lumi)
 Stephen Tago (Sohe)
 Sulnavi Otio (Lufa)
 Sununku Kroki'e (Henganofi)
 Tani Kungo (Kabisa)
 Tei Abal (Wabag)
 Tom Koraea (Gulf)
 Toni Iia (Lae)
 Tony Bais (Wewak)
 Undapmaina Kalagune (Obura-Wonenara)
 Walla Gukguk (Kavlang)
 Wap Yawo (Vanimo-Green River)
 Wesani Iwoksini (Telefomin)
 Wesley Embahe (Northen)
 William Elchorn (Angoram)
 Yambumbe Matias (Wosera-Gaul)
 Yubiti Yulaki (Kainantu)
 Puliwa Mapikon (Tambul-Nelbilyer)
 (I no stap - John Guise)

63 YESA LONG PANGU-YUNAITET

Praim Minista Michael Somare wantaim nupela lain Yunaitet Pati poroman bilong em long gavman i bin winim wantaim moa vot bilong palamen. Dispela taim 63 memba i bin vot yesa na 45 i bin vot egens. Long olgeta 109 memba long palamen, wanpela tasol i no bin vot. Em Sir John Guise. Pater Momis i lusim haus sik na i kam vot yesa; na Mista Kingsford Dibela, spia bilong haus, em tu i vot yesa.

Sir John Guise i bin lusim haus palamen na go arasait bipo ol i stat long vot, na sampela bikpela man bilong oposisen i ting dispela samting i bin paulim tru tingting bilong planti memba. Ol i lukim eksampel bilong ol bikpela save-man olsem Guise na sampela i senisim tingting na i vot nau wantaim gavman gen. Olsem na Somare i win isi tru.

Oposisen i wok hat tru ausait long palamen long pulim sampela wantok bilong Hailans na grisim ol long vot egens long Somare. Tasol ol i no win tumas. Wanpela bikpela man bilong gavman, Thomas Kavali, Minista Bilong Bosim ol Haus, i lusim gavman na i go sanap wantaim oposisen. Na nau em i lus olgeta; long wanem oposisen i lus.

Taim em i mosen long palamen egens long Mista Somare, Mista Noel Levi (bipo em i seketeri bilong difens) i tok olsem: "Mi pilim mipela i westim taim na i wari tumas long wanpela man tasol, em Michael Somare. Yes, em i bin mekim gutpela samting. Em na pati bilong em i bin bringim selp gavman na independens long PNG. Tasol em i samting bilong bipo. Mipela i tingting long nau, long tude. Ol i save mekim wanem samting tude? Mipela i no laik hangamap long wanpela man tasol."

Mista Somare i kirap bekim tok long dispela tok long dispela mosen olsem: Noel Levi i bilong wanpela smolpela politikal pati bipo, na dispela pati i no laikim gavman, na em i lusim gavman. Olsem wanem? Nau gavman i mas pinis? I mas kapsait? Watpo? Bikos wanpela liklik pati i no laik laka?

Yupela oposisen i tok

gavman i seksek nau na i laik pundaun na ol pipel i longlong long wok bilong em. Orait, husat i mekim ol i longlong? Gavman nogat. Gavman i ran gut, Papua Niugini gat biknem na gutnem long ol ausait kantri. Sapos gavman i no ran gut, ol ausait bisnis i no laik kam wok hia.

Sampela yupela oposisen i putim hevi long mi na i tok, ol man nabaut long opis bilong mi i stiaim tingting bilong mi na i grisim na pulim mi. Na mi no bihainim tingting bilong mi yet. Dispela i no tru. Na sampela yupela oposisen i stap bipo insait long gavman bilong mi i save pinis, em i no tru. Mi man bilong putim yau na harim tok bilong ol saveman. Mi no save long olgeta samting. Na sapos mi no save, mi askim ol saveman pastaim. Bihain mi harim ol pinis, mi pasim tingting bilong mi. Na em i tingting bilong mi; i no tingting bilong ol. Na hevi i kam long mi - sapos mi win o mi lus. Mi no olsem sampela man i tromoim telipon long het bilong ol saveman i laik skulim mi.

Mi givim sampela eksampel nau bilong soim mi bihainim tingting bilong mi yet. Taim yumi wok long raitim konstitusen, sampela man bilong pati bilong mi i laik wokim lo bilong tambuim ol sampela waitman long kamap sitisen. Na sapos tingting bilong ol dispela man i win, tude i no gat sampela memba bilong dispela palamen inap long sindaun hia. Tasol nogat. Mi egens long dispela kain lo. Long yia 1974 husat i sambai long ol dispela waitman i laik kamap sitisen? Mi wanpela tasol. Em i soim mi no bihainim tingting bilong ol arapela man. Nogat. Mi inap pasim tingting bilong mi yet.

Na yu tingting bek long

taim Bougainville i laik bruk lusim Papua Niugini. Ol bikpela saveman bilong politik na bilong gavman, ol i givim wanem skul na tok long mi? Klostu olgeta ol i tok: Maski. Salim ami i go insait, kalabusim Pater Momis wantaim ol lain bilong em. Tasol mi no bin bihainim dispela tok; mi bihainim tingting bilong mi na tude yumi wanpela kantri tasol. Olsem, dispela tok long ol arapela man i pulim nabaut tingting bilong mi i no tru.

Sampela yupela memba i bin sutim pinga long gavman bilong mi na i tok, ol pasin bilong mipela i bihainim tingting bilong ol sosialis na komyunis. Em i no tru olgeta. Mipela tu i laikim tumas ol bisnisman bilong ol ausait kantri i kam insait na kirapim na ranim ol bikpela bisnis. Tasol mipela i bilip ol i mas bihainim lo bilong mipela; mipela i mas bosim ol; ol i no mas bosim mipela. Papua Niugini i bosim dispela kantri na ol kampani i kam insait i mas bihainim laik na lo bilong PNG, olsem mipela i bin soim long Bougainville Kopa Kampani.

Yumi save pinis, dispela gavman em i demokrasi. Em i min ol pipel i bos. Ol pipel i ilektim yupela bilong makim ol; yupela ol lida i save ilektim praim minista. Yupela i makim mi pinis long ranim gavman. Orait, nau yupela i mas skelim gut, sapos dispela kantri i bin ran gut na gavman i bin ran gut o nogat. Sapos yupela i laik rausim mi long praim minista, orait, mi no gat tok.

Yupela yet i bin makim mi inap long faiv yia. Na sapos yupela i laik pinisim palamen nau bihain long wan yia tasol na yupela i laik go bek long ples na tokim ol pipel, ol lida i pait pait tasol long gav-

(I go moa long pes 2)

PAS I KAM LONG OL PIPEL

KROS LONG EDITA

Dia Edita - Taim mi ritim wanpela pas long WANTOK, Sarere, 28 Oktoba, pes 16, mi no amamas. Tru, mi belhat tru mi lukim dispela pas, Kanakimanda Famili long Gembogl/Chimbu i raitim.

Na mi bel nogut tru long yu, Edita. Bilong wanem yu putim dispela pas long WANTOK? Dispela pas i luk olsem aver-tismen: sapos yu laik save moa long pasin pamuk na long prais bilong ol meri bilong mipela, orait yu askim tasol.

Ating yu sot long ol pas i gat sampela gutpela ting na tok, olsem nau yu putim dispela kain rabis pas? Mi les long planti ol pas i kam na i tok tasol long dispela pasin nogut. Mi ting i gat planti ol arapela wari bilong pipel, yu ken autim long pepa bilong WANTOK.

Dispela Kanakimanda Famili nating ol i ting, ol meri i olsem pik na bulmakau, i samting bilong mekim bisnis long ol? Tru, pik na abus na ol samting bilong yumi, yumi ken putim long maket. Tasol yumi ken putim ol man o meri long maket, a?

Ol meri bilong yupela i samting bilong pinisim laik bilong ol man nabaut a? Mi ting, dispela kain bisnis i rabisim ol meri, i mekim ol meri i kamap olsem samting bilong yusim tasol. Sori, yupela Kanakimanda Famili, yupela i no gat sem tru long raitim dispela pas, na mi ting edita i paul long tingting bilong em taim i putim dispela pas.

Jerry Bus,
Madang.

PUTIM HEVI LONG MERI

Dia Edita - Mi laik autim liklik wari bilong mi long ol maritmeri save mekim ol man bilong ol save go wok wantaim hangre. No gat brekpas na lans.

Ol i save kirap long long

moningtaim tru, waswas, go long pilai kas.

Ol i go pilai kas, lusim olgeta mani long kas. Taim man i kam bek long wok long apinun na askim meri long kaikai, bai meri i kirap krosim em nogut tru na tok: "Yu no gat han? Yu save givim mi hamas mani na bai mi kukim kaikai long yu? Rabisman, pamukman, tu kina bus man.

Em i no rong bilong man na westim mani. Em meri yet i pilai kas na tromoim mani long kas.

Sapos yu husat man o meri i ritim na i no stret long yu, orait, rait tasol i go long Wantok Niuspepa. Bai mi ken ritim tu.

Tonini Y. Nicholas,
Lae.

NO KEN DAUNIM MAKAM PINAT BATA

Dia Edita - Plis mi laikim yupela putim kamap dispela sotpela tok bilong mi long bekim pas bilong wantok ya Yakuman Yales bilong Wapenamanda.

Brata, wantok bilong mi. Yu ting wanem long Makam Pinat Bata na yu raitim dispela tok long Wantok Niuspepa. Yu laik grisim ol manmeri bilong PNG long baim pinat bata long sampela hap na westim mani i go aut o yu laik developim kantri bilong yu yet em Papua Niugini?

Brata tingim gut na yu mekim tok long maus. Mi yet save olsem olgeta man bilong PNG i laikim tru long kaikai Makam Pinat Bata, na i no gat wanpela komplek i kamap.

Tasol ating yu dring spak na raitim dispela pas i go long Wantok Niuspepa, na pulapim spes bilong sampela gutpela tok. Long skul bilong mi, mipela olgeta taim save kaikai Makam pinat bata. Tasol i no gat wanpela samting i kamap. Mi ken tokim yu olsem ating yu kamapim belhat long planti faktori long Morobe Provins. Na yu laik katim daun Makam pinat bata na laik wokim long Wapenamanda.

Las tok em olsem wantok sapos yu laik kirap-

im kantri bilong mitupela. Yu no ken toknogutim pinat bata faktori bilong mitupela na grisim ol manmeri bilong PNG yet long baim pinat bata long narapela kantri. Baim long PNG tasol na mani i no ken i go raun insait long kantri.

Em tasol hap liklik bekim bilong mi. Tenkyu.

Benson S. Nare,
Banj/W.H.P.

WANEM LOTU?

Dia Edita - Hia nau namba wan taim bilong mi long rait i go long Wantok Niuspepa. Mi no gat samting bilong tokim aut tasol mi laik skruim ol toktok bilong Peter Y. Kundie long Wantok bilong Sarere, 14 Oktoba 1978. Em i bin toktok long olkain sios.

Mi laik skruim olsem ol man ya ol i save kros long ol planti sios i save tingting tasol long ol. Mi sapotim tok ol i gat planti we bilong lotuim God antap. Tasol God i save long hat bilong ol wan wan o i gat planti we bilong lotuim God tasol bai olgeta i save olsem em i tok long 1 Cor. 12:5. Yumi mas lotuim God long we yu ting em i gutpela moa olsem Katolik o Seven De o wanem moa.

I gat planti ol kain kain lotu tasol sapos yumi kam bung wantaim olgeta hat bilong yumi em bai yumi onaim Bikpela Jisas bilong yumi.

Em tasol sapos husat i ritim na i laik skruim moa i orait tasol.

Susan W. Kehoe,
Melelup Viles/N.S.P.

Salim ol pas
i kam long:
WANTOK
BOX 1982
BOROKO

NIPA HAISKUL

Dia Edita - Mi laik autim wari bilong mi i go long Wantok Niuspepa. Wari

bilong mi long dispela nupela haiskul i mas kamap Boding Skul. Mi bin lukim planti sumatin bilong dispela haiskul i slip long ples na ol i no stadi gut. Ol i save stap longwe tru olsem 100 na 150 kilomita na i save i go skul. Sampela taim ol i save kamap let long skul.

Ol tisa save givim panis-men long ol. Planti long ol dispela studen i no save stadi gut long haus bilong ol. Long wanem ol i no gat lait long haus bilong ol. Papamama bilong ol i no inap baim lam bilong wanem ol i no gat we bilong kism mani. Sampela studen i kam long ol famili i no gat planti mani samting.

Mi laikim Minista Bilong Edukesen i mas lukluk insait long dispela samting. N i mas kamapim Boding Skul na ol studen i mas slip long skul yet na mas stadi hat. Sapos ol i slip long skul bai ol i stadi gut na bai ol i pas long eksam bilong ol. Sampela taim ol pik i save bagarapim buk bilong ol na ol liklik bratasusa tu save brukim buk nabaut.

Taim ol i slip long skul ol i no inap bagarap. Ol liklik bratasusa save brukim buk bilong ol na ol tisa i no save givim narapela buk long ol studen.

Sapos ol i slip long skul yet ol buk bilong ol i no inap bagarap. I no gat planti P.M.V. na bas bilong kism ol studen i go long skul. Ol man i gat p.m.v. na bas i no tingting long kism ol studen i go long skul. Na sampela papamama i no gat p.m.v. o bas bilong kism ol pikinini bilong ol i go long skul.

Ol narapela aut stesin haiskul save painim dispela kain problem. Ol haus bilong tisa na klasrum tu i no kamap yet. Wataim tru bai dispela samting i kamap.

Plis bikman bilong mipela long palamen mas pait wantaim gavman. Sapos yu pait hat tru bai yu kism i kam long provins bilong yu.

Yu husat laik sapotim o egensim, rait tasol long Wantok Niuspepa.

Jacob Pond na Sam Ebil,
Nipa/S.H.P.

TUPELA SAIT

Dia Edita - Mi laik autim tingting bilong mi long wanpela pasin nogut i save kamap long maus bilong sampela manmeri bilong Papua Nu Gini.

Em olsem; sampela manmeri long nambis ol tok bilas long ol manmeri long hailans. Na ol hailans tu i tok bilas long ol nambis manmeri. Planti taim dispela kain tok i save kamap. "Ol man bilong hailans i kilim man i dai na kamapim planti trable. Ol nambis man i no gat gutpela bisnismen; ol i sindaun les tasol."

Dispela kain tingting mi ken tok: ol manmeri bilong nambis tasol i stap i no inap; na ol manmeri bilong hailans tasol i stap i no inap long kantri bilong yumi i go het. I no gat hailans tasol i kamapim trabel; na i no gat nambisman tasol i stap les na i no mekim gutpela wok bisnis. Nogut. Dispela pasin bilong kamapim trabel na les i no mekim gut bisnis, em yumi olgeta i gat. Yumi wanpela kantri na nem nogut; les, trabel i karapim yumi olgeta PNG.

Olsem na yu husat yu lukim wanpela man na meri i mekim pasin nogut olsem, yu no ken hangamapim dispela pasin nogut long tupela nem hia: Nambis na Hailans. Yu ken tokim em stret long ai bilong trabelman na lesman. Baimbai em inap stretim pasin bilong em i kamap gut. Yu toktok nating na putim long Wantok em i no stret. Plani manmeri i sem long dispela.

Yumi man bilong graun, yumi tasol i no inap daunim pasin nogut na pasin les. Yumi yet i no inap mekim wanpela wok i go het. Olsem na yumi ken prea long Bikpela Jisas, Holi Spirit bilong Bikpela, inap stiaim yumi long yumi mekim gutpela wok na daunim pasin nogut i stap long yumi.

Yu laik bagarapim ol brata susa? O yu laik helpim ol? Yu laik brukim kantri o yu laikim bung wantaim?

Mr White Abuo,
Finschhafen/Morobe.

Wes Sepik

Vanimo lokal gavman kaunsil wari

Mista Terry Berrett i tok aut long ful kaunsil olsem. Em i bin kisim wanpela pas i kam long Het Kota long Port Moresby. Dispela pas i bekim pas bilong kaunsil long toktok i no ken lukautim moa ol Viles Kot Mejistret long wok bilong ol. Em pas i kam long lukautim wok bilong Viles Kot bai pinisim viles kot long Vanimo.

Em i tok klia long egrimen, em presiden bilong Vanimo Kaunsil i sainim long tok promis long Kaunsil long lukautim viles kot. Em i tok, wok bilong ol Viles Kot, em sampela gavman i helpim na sampela bai kaunsil i helpim. Olsem toktok i stap pinis long egrimen.

GRAUN

Mista Brian Doet wanpela opisa bilong Lands Midieta i tokaut long ol kaunsil long wok bilong Land Midieta Komiti. Em i tok Land Midieta, em wok bilong ol long stretim ol kain kain wari bilong graun. Em dispela i kamap pinis long sampela hap tasol long Wes Sepik, Vanimo, i no gat yet. Mista Doet i tok sapos ol i gat laik bai ol i makim tupela man long salim tok i go long em. Na bai em i kam bek na givim liklik skul long dispela tupela man ya.

Kaunsila Nehu i tok ol kaunsil bai i go long wan wan ples bilong ol na tok save gut long ol pipel. Bihain bai ol pipel bilong Is Kos na Wes Kos i ken holim wanpela miting bilong makim tupela man. Wanpela bilong Is Kos na nara-pela bilong Wes Kos.

Mista Doet i tok, em i gutpela tingting sapos ol i holim miting na makim pinis tupela man, orait, ol

i ken salim pas gen long em long kam givim skul long tupela long wok bilong Land Midieta.

Enga

Wok komiti go airaun

Primia bilong Enga Provins, Mista Don Kapi, i wari long wanem ol i lusim planti gutpela saveman tumas long hap bilong Enga long wanem i no gat haus bilong ol famili bilong ol.

Provinsal gavman i wok long stretim dispela wari. Na man i makim Wok Komiti bilong palamen, Mista Martin ToVadek i tok, ol i no ken wari: lain memba bilong em long dispela komiti ol i bilong olgeta politikal pati tru: bilong Pangu na Pipels Progres na Yunaitet Pati, na Pipels Yunaitet Fran. Ol i save skelim gut olgeta askim.

Dispela komiti bilong Mista ToVadek i lusim tripela de olgeta long Enga na i airaun long lukim ol helt senta na haiskul na rot na bris na wara na wok fama. Ol i lukim Laiagam, na Porgera, na Kandep, na Pumas, na Anditali na Wapenamanda na Wabag.

Bihain ol i lukim ol samting pinis, orait, dispela komiti i tok olsem: namba wan yumi mas wokim Kandep Provinsal Haiskul na stretim tru ol rot.

Provinsal gavman i laik bai gavman i kirapim wanpela bikpela maket bilong ol samting bilong gaden bai ol pipel i ken winim mani olsem. Long wanem ol Enga i no gat spes bilong kopi na kain samting olsem.

Poto i soim hap daun-bilo bilong wanpela bikpela famili haus olsem yu ken painim long Sepik antap - na long Wes Sepik tu. Em i olsem woksap tu bilong ol man sapim kaving samting. Antap em i haus bilong sampela famili wantaim. Em i longpela haus moa.

Not Solomons

Daiosis senet bekim tok

KATEKIS PE

Katekis i mam kisim pe taim em i wok. Ol lapun katekis tu ol i mas kisim pe maski sapos ol i no wok. Pater i ken yusim ol mani em i kisim long koleksen bilong baim ol.

Bekim: Katekis i mas kisim pe taim em i wok olsem Konstitusen i tok. Long baim ol lapun katekis, em i samting bilong wan wan Peris. Sapos em i laik em i baim. I gat lo i stap pinis i mas gat tupela akaun bilong Peris. Wanpela bilong Peris wantaim bilong ol Peris Kaunsil na Pesenel akaun bilong Peris Pris.

SENISIM KATEKIS

Em inap yumi senis nabaut sampela katekis olse olsem bai sampela bilong wanpela peris ol i ken go wok long narapela peris?

Bekim: Em i gutpela long sotpela taim. Tasol ol katekis i gat wok gaden bilong ol. Long ol marit katekis i hat. Tasol ol singel katekis em i ken orait. Na Daiosis Senet i no gat pawa long toktok long katekis bikos em yet i no gat katekis.

REDIO PROGRAM BILONG OL YANGPELA

Long kliaim dispela, memba bilong Y.C. i tok: oltaim i gat tok olsem.

Yangpela man na meri i trabel. Tasol wanem samting mipela i mekim? Helpim i kam we? Daiosis Senet i mas painim sampela we long helpim ol yangpela.

Dispela taim i no gat wanpela program long redio bilong ol yangpela. Sapos i gat wanpela program long redio. Daiosis Senet yet i mas tokaut wanem samting i mas go long dispela program.

HELT SEVIS

Helt Minista bilong Provinsal Gavman i bin tok tru long wanpela samting: Em ol sios helt sevis i slek liklik. Tasol em i gat gutpela as bilong dispela.

Bekim: Mipela Katolik Sios i bihainim polisi bilong gavman em long selp rilaiyens. Bikos ol dispela pipel ol i no helpim Sios long ranim ol haus sik, na olsem sevis i slek. Tasol helt minista bilong provins em i no luksave yet long polisi bilong selp rilaiyens.

Ol dispela pipel ol i komplem long helt minista em ol tasol i no laik givim help long mani na wok long ol haus sik bilong yumi.

KAUNSILOKIM SKUL

Wan wan Peris Kaunsil i gat traipela risponsibiliti bai Kristen bilip na pasin long Peris i go het stret long sindaun bilong ol pipel. Na olsem long sampela Peris ol i bin tambuim Bod Bilong Menesmen wantaim ol tisa long salim bia bilong mekim mani bilong skul. Bikos taim ol i salim bia ol i singautim ol spakman na ol i bagarapim skul.

Sampela peris tu ol i tambuim pawa ben, bikos taim sampela spakman i danis, ol i save tok nogutim sampela tisa. Ol i no mekim gutpela pasin long skul.

Long ol dispela kain trabel mipela i tokaut pinis long em, Peris Kaunsil i no inap pasim maus bilong em na lukluk nating olsem wanpela man i no gat risponsibiliti.

MORATONA HAUS SIK

Moratona Haus Sik i no olsem bipo taim Patere Harding i stap. Brata William i go pinis na Maris Misineri Sista bai i go. I luk olsem bai i pas. Na naispela haus bai olsem wanem?

Tingting bilong mi i olsem: bai Daiosis i mas kipim na lukautim.





Strong Tru.

HUSKY DYNA

**Niupela trak bilong Toyota i save wok hat tru.
Yu laik karim kago o pasindia – long biktaun
o rot nogut long bus – dispela trak em inap.**

TOYOTA

BRANCHES PORT MORESBY LAE MT. HAGEN
AT: 25 4088 42 2322 52 1888

ELA MOTORS LIMITED

MADANG
82 2188

RABAUL
92 1988

KIETA
95 6083


WEWAK
86 2255

GSP ET 013P

Interchangeable Elements



IBM Tech II Ribbon



The IBM
Selectric II
Typewriter



SERVICE THROUGHOUT THE COUNTRY

PORT MORESBY
P.O. Box 633
Tel: 25 6230 – 25 3891
Telex: NE22229

LAE
P.O. Box 759
Tel: 42 3941
Telex: NE42416

RABAUL
P.O. Box 1239
Tel: 92 2990
Telex: NE92926

AKAWA
P.O. Box 661
Tel: 95 1081



SOL

Filipino Sup

Ol samting yu mas i gat:

- 3-pela tomato
- sampela liklik grinpela anian
- eggplant o soko
- pamken
- bin
- sampela kumu
- sol
- kawarar
- 1-pela drai kokonas
- pis yu bin praim pinis

Rot bilong wokim:

1. Wasim olgeta sayor. Katim tomato, anien na kawarar i go liklik liklik. Katim soko, pamken na bin long bikpela bikpela hap.
2. Rausim bun bilong pis
3. Skrapim kokonas na wokim gris bilong em.
4. Putim olgeta sayor wantaim pis na kawarar long gris bilong kokonas.
5. Kukim olgeta long paia.
6. Katim kumu. Taim sayor i klostu i tan, putim kumu i go wantaim arapela sayor.
7. Larim i tan pastaim na kaikai.

BILONG WANEM???

Long planti kantri - long PNG tu - lo i no wankain long ol man na ol meri. Sapos boi i go pamuk nabaut long ol meri, long planti kantri lo i no gat tok long em. Tasol lo i gat tok long meri pamuk. Man i pamukim meri, em i rongim meri. Meri i no rongim em. Na olsem wanem na lo i tok meri i gat rong?



Ol dispela stori bilong kukim gutpela kaikai i kam long wanpela gutpela buk ol i kolim Buk Bilong Kukim Gutpela Kaikai. Yu ken kisim nating. Yu rait tasol i go long:

**The Nutrition Section,
Department of Health,
P.O. Box 2084,
Konedobu.**



Ol meri long ami



Mista John Noel, taim em i minista bilong difens i bin tokim palamen olsem, em i laikim dispela aidia long larim ol meri tu i joinim ami. Na em i ting i no hatwok tu-mas long wokim dispela.

Mista Pondros bilong Manus ailan i bin tok olsem: PNG i ken mekim olsem kantri Jsrel i bringim ol meri insait long ami. Na Mista Pondros i tok tu, em i ting em i gutpela aidia long yumi wokim ol gan na katres bilong yumi yet.

Tasol Mista Noel i bekim tok long dispela olsem: yumi inap wokim ol raifel na gan na katres sapos i gat inap mani. Tasol mi pret, nogut yumi stapim wok long rot o long wanpela haus sik. . . na dispela mani bai go long wokim katres na raifel samting.



Gipo Sop Paura pulim long strong bilong muli Save klinim han na klos isi tru



**Wasim klos long sop i gat pawa
Yusim Gipo sop paura**

Distributed by.

SEETO KUI (HOLDINGS) PTY. LIMITED

PAPUA NEW GUINEA

Wholesalers	Distributors	Agents
Head Office: LAE	P.O. Box 456	Phone 42 1111
Branches: GOROKA	P.O. Box 115	Phone 72 1892
MT. HAGEN	P.O. Box 232	Phone 52 1424
PORT MORESBY	P.O. Box 1405	Phone 25 4700
		Telex: SETOKUI NE 42417
		Telex: SETOKUI NE 52018
		CABLES: SEETOKUI - LAE

OL I TOK

Kevin Egan
(Bikpela loman bilong gavman)

Ofis bilong em i bin givim wangepa ripot long gavman na ol i bin painim olsem: strongpela dring i as tru bilong planti kain pasin nogut olsem stil na pait na olkain birua long haiwe.

Ripot bilong em i tok tu, ol i bin painim long wan wan gavman dipatmen olsem: nau planti moa publik sevan, na klak, na kuskus, na man i gat bikpela wok na bikpela namba. i save trikim gavman na save stil planti.

Ebia Olewale
(Minista bilong Foren Afeas)

Gavman i no laik moa long givim sitisensip long ol Wes Irian, long wanem, planti i bin kisim sitisensip na i kirapim kain kain wari. Ol i yusim tasol bilong helpim ol aidia bilong ol. Olsem na gavman i pasim rot nau bilong ol na ol i no ken kisim sitisensip. Ol Wes Irian i bel nogut long harim dispela tok bilong gavman minista.

Ofis ov Infomesen

Sampela wik bipo ol saveman bilong olkain dipatmen bilong gavman i bin kibung na toktok long olkain wok bilong redio na niuspepa na olkain samting olsem. Na wangepa samting ol i no bin toktok long en. Em hia: bai yumi mas yusim wanem tok ples taim yumi toktok wantaim ol pipel? Inglis? Pisin? Tok Ples?

Em i bikpela samting tru tru, na mipela long Wantok i ting dispela em i as bilong planti trabel bilong gavman. Na planti dipatmen bilong em i popaia tru long givim tok save long ol pipel.

Nau ol i putim wangepa miting long 24 Novemba na sampela memba bilong palamen bai stap na autim tingting bilong gavman long yusim wanem tok ples long givim nius, long edukesen, long trenim ol pipel, long autim tok save long ol pipel.

Mi skul longtaim moa

Asbishop Herman ToPaivu bilong Port Moresby i winim 25 yia long wok pris bilong em. Long Sande, 12 Novemba samting olsem 3500 pipel i bin bung long bikpela ragbi graun long Boroko na i lotu amamas wantaim em. Wapela Wantok ripota i bin go long haus bilong Asbisop ToPaivu na em i stori olsem long laip bilong em:

Mi no save mi gat hamas krismas. Mi bilong viles Tapo long hap bilong Vunapope/Kokopo long Rabaul. Mipela i 7 brata-susa; mi yangpela bilong ol na mi wapela i boi; ol arapela i meri. Mi save, wapela susa bilong mi i bilong yia 1910. Olsem na mi ting mi kamap long yia 1911 samting na olsem nau mi gat 67 yia samting.

Yia 1911 em i Jemantaim; tasol mi no save liklik long ol Jeman. Mi go skul long Tapo long yia 1918 na wapela lapun lokal Sista tru i gat 82 krismas nau (lukim long Wantok namba 242 pes 5) em i skulim mi.

Man, mi lukluk i go bek nau. . . na mi lukim mi bin skul inap planti yia moa bipo mi kamap pris. Planti samting i bin kam insait na paulim skul bilong mi. Mi winim samting olsem 8 yia long viles skul

long Tapo na bihain gen mi winim narapela 6 yia long Taligigam katekis skul. Hia em i namba wantaim mi bin skul liklik long tok Inglis. Bipo olgeta skul i long tok ples Tolai, em Kuanua o Gunantunan.

Namba wan taim mi kisim aidia long kamap pris, em i long wapela liklik niuspepa long tok ples, nem bilong em "Talaigu." Hi mi bin ritim ol stori bilong ol lokal pris bilong Afrika na Saina na mi ting olsem: Bilong wanem mipela Papua Niugini i no ken gat sampela pris tu? Na wapela de Bisop Vesters i askim mi long dispela samting. Na mi yesa long em. Olsem nau em i go painim wapela buk long tok Latin. - em tok ples lotu katolik bipo - na mi stat long lainim. Tasol mi no painim hat tumas. Bisop yet i skulim mi. Ating mi namba wan man bilong PNG i skul

long tok ples Latin. Bihain mi winim Tali-gigam na mi go bek long ples Tapo na mi helpim pris. Na olgeta apinun em i skulim mi moa long tok Latin yet. Bisop i laikim tumas dispela aidia long mi stadi long kamap pris. Olsem na ol i wokim wapela liklik haus bilong mi long Vunapope yet, na Pater Haverkamp i skulim mi. Dispela Pater i tok Inglis tasol long mi, olsem na nau mi save gut long tok Inglis.

Tasol long dispela sem taim i gat wan wan boi long Papua tu i stadi long kamap pris. Bisop bilong Papua long dispela taim, Bisop De Boismenu, i pasim tok wantaim Bisop Vesters, na tupela i wokim wapela semineri tru long Vunapope long yia 1937. Mi no ken lusim ting long yia 1937. Long dispela yia Rabaul i bagarap olgeta long maunten i pairap long mun Me na Jun.

Orait, long 8 Septemba 1937 mipela i statim semineri long Vunapope. Mipela i tupela Tolai (Bisop ToBata wantaim mi), na 3-pela Papua, na 3-pela bilong Bougainville. Taim bikpela woa i stat long 1942, mipela long semineri i 24 studen. Wapela bik-



pela man bilong PNG i skul wantaim mipela long dispela taim em Matias Toliman, em minista bilong edukesen bipo. Na narapela man bilong palamen bipo em tu i stadi wantaim mipela long Bougainville, em Paul Lapun.

Taim bikpela pait na ol Japan i kamap, mipela ol seminerien i stap kalabus wantaim long misineri long Vunapope. Tasol bihain ol Amerika na Australia i kam tromoim planti bom, ol misineri i surik i go insait long bus, na mipela olgeta i go bek long ples na wetim pinis bilong pait. Long dispela taim mi stap gen long Tapo na mi wantaim ol katekis na lida i ranim peris. Na long dispela taim mi pilim tru olsem wanem ol manmeri nating i no pris o brata o sista - i ken mekim gutpela bikpela wok long sios.

Woa i pinis, tasol dispela tingting bilong kamap pris

i no pinis long het bilong mi. Olsem na Bisop Scharmach i salim mi na 3-pela arapela man i go stadi long semineri bilong Bisop Wade long Torokina long Bougainville. Na long yia 1953 mi winim olgeta stadi pinis. Man, em i longtaim moa. . . long wanem mi stat long holim pensil namba wan taim long yia 1918. Mi kisim sakramen bilong ordo i mekim mi pris long 15 Novemba 1953 long han bilong Bisop Scharmach long Vunapope. Na Wanklas bilong mi, Bisop ToBata, em tu i kamap pris long sem de - tasol long ples Vuvu na long han bilong Bisop Vesters.


Orait, nau wok pris tru bilong mi i stat. Pastaim mi go bek long asples bilong mi Tapo inap wan yia hap. Bihain mi go wok long ol maunten long Papatava inap tu yia. Bihain gen mi kamap man (i go moa long pes 16)





PIUS BONJUI

Pius i marit na i kam long ples Korogo long Wara Sepik long Is Sepik Provins. Long yia 1966 em i stat wok long Redio Wewak bihain long em i bin pinisim trening bilong em long Dipatmen ov Infomesen. Long 1970 em i kam bek wok long hetkota long Moresby. Na long 1972 em i wok klostu wan yia long Redio Milne Bay olsem wanpela nius ripota. Long yia 1973 em i stat long wok wantaim dipatmen bilong plis.



JOHN PAPIK

Em i kam long Tumleo, wanpela smolpela ailan klostu long Aitape long Wes Sepik. Em i winim Brandi Haiskul long Wewak long 1969. Em i wok long Redio Is Sepik long 1971 inap 1973. Em i wok long hetkota bilong Opis ov Infomesen long Moresby na joinim NBC olsem anaunsa. Em i go long Australia long 1977 na i tren yet inap long 1980.



GABRIEL LEVAKIA

Mama i karim Gabriel long Malmal, em wanpela ples long hap bilong Pomio long Is Nu Briten. Em i skul long St. Marys Skul long Vuvu na i joinim ABC long Port Moresby long 1963. Bihain em i memba bilong NBC. Em i wok long Rabaul, Madang, na Port Moresby. Em i joinim Redio Australia long Novemba 1977.



ELIAS RATHLEY

Em i gat 28 krismas na i kam long Taulil viles klostu long Rabaul. Em i pinisim praimer skul long Tudungan; i go long Malabunga Haiskul na Keravat. Em i statim wok olsem brotkas ofisa long Port Moresby long 1969. Em i wok long Moresby, Redio Maus bilong San Kamap, Redio Manus, na Redio Is Nu Briten. Em i tren nau inap 3 yia long Australia.



WARIUM BENSON

Em i kam long viles Nondup/Rabaul long Is Nu Briten. Em i winim Keravat Haiskul, na Sogeri Haiskul, na Sydney Trening Institut. Em i joinim ABC long 1963 na i wok long Port Moresby na Rabaul. Em i joinim Redio Australia long yia 1974.

REDIO AUSTRALIA NIUS LONG TOK PISIN



PAULINE AGNES LUMA

Em i kam long Avatip viles klostu long Ambunti long Is Sepik Provins. Em i winim Brandi Haiskul long Wewak. Long 1972 em i komyuniti developmen ofisa long Isten Hailans. Long 1973 em i go long Edministretiv Koles na i mekim kain kain welfe wok long Port Moresby. Long 1974 em i wok long Saten Hailans wantaim komyuniti senta na edukesen, na klap na spot. Long 1975 na 76 em i wok long Wes Sepik, nabaut long Vanimo, wantaim ol meri, na welfe wok na bungim nius. Long 1977 em i joinim Redio Australia na pinisim kos long wok redio. Em i bin raun long Yurop na India na Singapore.

Olgeta apinun sapos yu laik harim nius long Tok Pisin i kam long Redio Australia, yu ken stat long harim long seven klok. Yu mas tanim wil long redio bilong yu long lain namba ol i kolim SW2. Hia yu ken painim ol dispela program long Tok Pisin long 31 mita na 25 mita. I gat kain kain progrem long Tok Pisin i go inap 8 klok olgeta de.

PETER ZOVI

Em i gat 25 krismas na i kam long Awar viles klostu long Bogia long Madang Provins. Em i marit na i gat wanpela pikinini. Em i winim fom 4 na i joinim redio long 1970. Nau em i tren long ABC long Australia.



KATHLEEN SAKIAS

Sapos yu laikim sampela tok save long olkain progrem bilong Redio Australia, o yu laik salim pas i go long ol bilong makim sampela singsing bilong wan wan, o sapos yu laikim sampela dispela poto bilong ol anaunsa i stap long dispela pes, orait, yu ken rait long dispela tupela adres:


*Redio Australia
P.O. Box 779
Port Moresby*

*Radio Australia
Box 428 G
G.P.O. Melbourne
Australia*



Mi kam long Noipuos viles long Nu Hanova ailan long Nu Ailan Provins. Mi winim Madina Haiskul inap 1971. Long 1972 mi joinim wok redio na mi wok long Rabaul. Long 1973 mi tren long ofisa skul long Australia. Mi bosim Redio Nu Ailan inap long 1974. Bihain mi kam long Port Moresby na wok long hetkota bilong NBC. Mi winim felosip na mi raun long lukim ol famili plening program long Indonesia, Filipin Ailan, Singapore, na Malaysia. Long 1977 mi joinim Redio Australia olsem program ofisa. Mi ranim sampela program bilong ol meri nau na tu mi save ritim nius.

Maxell Helpim OI




Maxell bateri i stap long olgeta hap.
Taim yu go long stua yu mas askim long Maxell tasol.
Maxell i no inap pinis kwik. Em bai i stap longtaim tru
...Maxell

Kisim Maxell bateri tasol



GSHM03

PIPEL LONG NIUS



Poto antap i soim Pasto Albert Burua (namel) na Pasto Leslie Boseto (raithan). Tupela i bikman bilong Yunaitet Sios. Hetman bilong dispela sios nau em i Leslie Boseto; em i bilong Solomon Ailans.

Nesenel asembli bilong Yunaitet Sios i bin kibung long Rabaul na i bin makim Pasto Burua long senisim Pasto Boseto olsem hetman, stat long namba wan de bilong yia 1980.

Pasto Burua i kam long Matalau long Is Nu Briten na nau em i hetmasta bilong Rarongo Koles long Rabaul. Em i gat 36 krismas; em i marit na i gat 2-pela pikinini. Em i bin skul long Australia na long Amerika bipo.

Em i pasim astingting bilong em olsem: "Gutnius bi-long Jisas Kraus em i bringim gutpela nius long olgeta kain kalsa. Em i no krungutim o rausim wanpela kalsa. Nogat. Em i stiaim na helpim ol tasol."

17. Wanpela man i save skulim narapela man - olsem wanpela hap ain i save sapim narapela hap. (Buk Bilong Proverb long Olpela Testamen)

Kieta embulens kadet win tru

Poto i soim tupela yangpela man bilong Not Solomons i pinisim kos long Sen Jon Embulens long Port Moresby.

Tupela man ya, Simeon Koriho (14 yia), na Blaise Nangoi (16 yia), tupela i stap long gret 9 long Sen Josep Haikul long Kieta. Ol Maris Brata i ranim dispela skul.

Dispela skul i narakain. Em i gat wanpela lain kadet embulens woka, olsem tupela ya. I gat 30 memba long dispela lain na namba wan man bilong bosim Sen Jon Embulens long Port Moresby, Mista Graeme Keake, i tok: ol embulens kadet bilong dispela skul i win tru.

Ol 30 kadet wantaim hetman bilong ol (em wanpela brata bipo em i mekim dispela wok long Australia) i sambai redi long nait na long san. Olgeta taim ol plisman bilong Kieta i painim wanpela long rot o long wanem hap, ol i ring long skul. Wantu man i bosim embulens i winim wanpela hon na sampela kadet i sambai redi long dispela de o nait, ol i resis i go long embulens na spit i go helpim tarangu i kisim bagarap.

Ol kadet tu i sambai long olgeta spot na pilai na helpim ol manmeri i kisim birua long spot. Ol i save



mekim wok klinik tu na ol i lukautim olgeta studen long skul em ol i gat sik. Ol kadet ya i mekim ol dispela wok long laik bilong ol yet. No gat pe bilong en.

Tupela boi i lukim Port Moresby namba wan taim nau. Na tupela i kalap nogut. Hia i gat tumas

pipel na tumas ka na tupela i pret; tupela i laik go bek long Kieta.

Long Port Moresby Sen Jon Embulens pipel i save skulim ol wokman long Air Niugini na ol woksip long bris long pasin bilong helpim man i bagarap.

TAMBU TORO



OL SIOS TING WANEM LONG EDUKESEN?

Long de namba 14 na 15 bilong Novemba i gat wanpela kibung long Port Moresby bilong Edukesen Kaunsil bilong ol Sios. Ol memba bilong dispela kaunsil i: Engliken Sios, Katolik Sios, Evanjelikal Alaians, Evangelikal Luteran Sios, Wabag Gutnius Luteran Sios, na Yunaitet Sios.

Olgeta dispela sios wantaim i ranim tu taim moa skul long dispela kantri olsem gavman i ranim. Olsem ol i pilim ol i ken helpim gavman na gavman i ken helpim ol yet long wok edukesen.

Long dispela kibung ol i bin paitim tok long planti samting olsem:

- (a) pasin bilong gavman i helpim ol sios long wokim skul
- (b) pasin bilong skulim ol sumatin long tok bilong God long ol skul
- (c) pasin bilong trenim ol lida tru
- (d) pasin bilong bosim gut kain buk i go long ol skul laibreri



- (e) pasin bilong yusim mani bilong edukesen bot na dipatmen

Ol memba bilong kaunsil i wari long bikpela mani tumas i lus long PNG long skulim ol sumatin. Ol i bin painimaut olsem, em i kostim \$283 long skulim wan wan sumatin long PNG long wan yia. Em i

antap tumas. Long Filipin Ailan em i kostim \$23 tasol; na long kantri Bangladesh em i kostim \$10 long wan wan studen. Planti kantri long Esia na Pasifik i gat gutpela skul tru, na i kostim liklik tasol. Yunaitet Nesens yet i bin painimaut olsem.

Dispela Kaunsil i tok

tenkyu long gutpela wok bilong edukesen dipatmen.

Tasol em i pilim olsem, dispela dipatmen i lusim planti mani tumas. Watpo em i no ken mekim ol studen long bikpela skul tru olsem yunivesiti i baim skul fi tu? Watpo edukesen dipatmen i gat ol bikpela hetkota tumas? Watpo

planti ofisa tumas i save raun tumas long ol ausait kantri?



Poto i soim ol memba bilong Edukesen Kaunsil bilong ol Sios. Ol i sindaun, kirap long lephan: Benjamin Tauwaole (Yunaitet Sios), Josaphat Makail (Katolik), Iakey Ronuc (Elcong), Mackenzie Daugi (Engliken). Ol i sanap, kirap long lephan: Pater Salvator Daugherty (Katolik), Mis Helen Smith (Evanjelikal Alaians), Dick Hilgendorf (Wabag Gutnius Luteran).

TISA NIUS

Hetman bilong dipatmen bilong edukesen, Mista Alkan Tololo, i bin tok save olsem: long dispela yia i gat 850 studen i bin winim ol Komyuniti Tisa Koles bilong PNG na long yia 1979 bai ol inap painim wok long ol kom-yuniti skul. I no gat wari long dispela.


Aveling Barford Pacific Pty. Ltd. For your civil engineering, agricultural and domestic machinery.

Graders
Weight range 11,000-19,000 kg
All Wheel Drive and Steer
Conventional
Leaning Wheel
Hydraulic Controls
Powered by Leyland or
G.M.
Powershift or Standard
Transmission



Front End Loaders
Bucket Sizes of 1.3 cu. metres to 3.82 cu. metres
Pivot or rigid frame available
Logging Attachments

Rollers
Vibratory Rollers
Self-propelled or Towed
Hydrostatic Drive
Pivot Steer
Asphalt Conversion
Padfoot Roll



Head Office: Ume St., Gordon, Port Moresby,
P.O. Box 6457. Phone 257166. Telex 22206.
Lae Depot: Morobe Ave, P.O. Box 1191, Lae.
Phone 424188. Telex 42411.

STORI BILONG TUMBUNA



kanu bilong ol long ston bilong kalibobo. Ol i subim strong na goap long dispela ailan na ol i stap na indai long dispela ailan.

Na dispela ailan i no gat man i stap long em i kam inap nau. Em i stap namel long ples balus na Kerosin Ailan.

Edward Misob,
P.O. Box 80,
Lae.


Bipo tru long hap bilong Madang long wanpela liklik ples ol i kolim Biliau. Ples ya i stap klostu tasol long nambis. Dispela taim ol i wokim ol bikpela kanu long i go long Raikos long salim ol samting. Wanpela taim ol man long Raikos ol i singautim ol long wanpela bikpela kaikai na sing-sing tumbuna. Orait, ol man long Biliau ol i redim ol samting na putim long ol kanu.

Ol pikinini i stap wetim ol i go na ol i hangre nogut tru, na ol i singaut long papamama bilong ol long kam hariap. Tasol ol tewel i bekim maus bilong ol na tok mipela i kam nau. Ol tewel i makim pes bilong papamama bilong ol, na kisim ol plet kaikai i kam na givim ol kaikai. Tasol tupela pikinini i hait aninit long bet bilong kanu na lukim ol i stap.

Taim ol sampela pikinini i kaikai, ol i tanim tewel. Ol i stap liklik tasol, na mamapapa tru bilong ol i kamap. Tasol ol lukim olgeta pikinini i tanim tewel pinis. Tupela pikinini i hait aninit long bet bilong kanu ol i kamap na tokim ol stori, orait ol kirap kisim narapela kanu na lusim narapela kanu bi-

long ol pikinini tanim tewel, ol papamama kisim tupela pikinini na ol i pul i go bek long Madang. Ol pikinini tanim tewel ia ol i

goap long kanu na tait i karim ol i go long Madang. Taim ol kamap long Madang, draipela solwara i karim ol i go na brukim



TULTUL TITAN

QUTPELA TINTING BILONG YU NA YU SINGAUTIM MI NA MISIS BILONG MI FIASI LONG I KAM, LONG SOIM YU STRONGPELA KAIN BANIS. YU SANAPIM POS PINIS. NAU YU MAS KISIM STRONGPELA ARC-TITAN HINGE JOIN O FIG WAIA WANTAIM BAB WAIA NA PULIM TAITIM WAIA NA KISIM ARC-TITAN HUK NIL NA NILIM WAIA LONG POS. BAI BANIS STRONG MOA. OL PIK INO FIT LONG BRUKIM.

TENKYU LONG TOKSAVE BILONG YU TITAN.....

AYO AWID... BAI YU GAT BIKPELAGADEN TRU YA....

ARC-TITAN Pty. Ltd. P.O. Box 1026, LAE. Tel. 42.3988.

STORI BILONG ASBISOP TOPAIVU

(i kam long pes 9)

bilang ailan na solwara, long wanem mi pater bilong Poi Ailan klostu long Talasea long Wes Nu Briten. Em inap 7 yia stret. Na long 1964 ol i salim mi go wok long Rabaul. Long dispela taim mi wok long Volavolo - ating em i namba wan katolik peris long PNG. Em i stat long 1982.

Long yia 1974, taim mi wok long Vunawavar klostu long Vuvu, wampela de dispela tok i kamap long mi: "Bisop i laik lukim yu tude yet, long apinun long 5 klok stret."

Na mi save gut tumas long Asbisop Hoehne - bipo em i tisa bilang mi. Nau mi wari. Ating mi bin mekim wampela rong o wampela asua? Dispela bisop i no man bilang singautim yu nating i kam. Nogat. Olsem wanem nau?

Orait, mi go insait long haus bisop na mi sindaun, na em i lukluk strong long pes bilang mi na i tok olsem: "Pop Pol i laik bai yu kamap namba tu bisop bilang Port Moresby. Olsem wanem? Yu orait long dispela tok o nogat?"

Sori, mi maupas olgeta; mi kalap nogut tru. Inap ten minit samting mitupela wantaim i sarap i stap. Orait, nau mi daunim spet bilang mi na mi tok olsem:

"I orait. Sapos em i laik bilang Pop, mi ken mekim." Bihain long tupela wik tasol ol i bin autim dispela tok save long ol pipel.

Bihain mi kam lukim Moresby inap tu mun samting; long wanem mi no save long en. Mi bin lukim Bomana tasol na ples ba-

lus. Orait, mi go bek na ol i mekim mi kamap bisop long 24 Oktoba 1974 long Vunapope gen. Bihain mi surik i go long Moresby na Asbisop Copas, bosman bilong mi, i sevis long wok bilang em long Ista Sande, 1976. Na nau mi kisim ples bilang em na kamap asbisop.

Mi gat bikpela famili tru nau. Yu lukim, mi gat 32,000 katolik pipel, 15 peris, 44 pris, 15 brata, 91 sista, 17 komyuniti skul, 2 haiskul, na 1-pela vokesenel senta.

WAILES SENIS

Stat long las de bilang mun Novemba olgeta misin na bot na stesin i gat wailes bilang salim na kisim tok, ol bai senis na brotkas long wampela spesel kain we, ol i kolim singel sait ben. Bipo sapos yu gat wampela liklik transista redio nating, yu inap harim tok bilang ol misin na sip na balus. Bihain bai nogat. Yu mas gat spesel redio tru bilang kisim tok bilang singel sait ben (SSB).

Johnson gat Strong

• Save wok hat




• Yusim liklik bensin



• Save ran longtaim

• Gat planti mekenik na spea pat

Johnson



**YU NO
MAS PEIM
MOA LONG
KISIM
JOHNSON
PAWA
NA SAVE**

**6 hospawa
15 hospawa
25 hospawa
35 hospawa**

Yu ken kisim nau long
ANGORAM
Lukim Ludwig Schulze

Plantation Supply and Service



PES BILONG PIKININI



Gat rait long pilai

Liklik man long poto long dispela pes i pilai long wok. Pilai em i rait bilong olgeta pikinini. Em i samting bilong laip bilong ol. Taim ol i yangpela yet, em i taim bilong pilai. Tasol, tarangu, long planti kantri tru ol liklik manki i no gat skul, na ol i mas go long wok.

Long stori bilong planti kantri sampela bikpela man i bungim ol liklik pikinini na putim ol long woksap taim ol i yangpela tru. Na ol i wok, wok. . . na ol i dai yangpela yet. Long kain kantri olsem, ol pikinini i no save long pasin bilong pilai kain kain spot. Nogat. Ol i mas wok bilong winim wan siling bilong painim kaikai bilong ol. Tasol em i no stret.

Long planti dispela kain ples bilong biktaun na woksap ol bosman tu i yusim ol manki olsem slev tru. Ol i mekim ol i hatwok tru na kisim liklik pe. Long wanem ol rul na lo bilong pe i karamapim ol bikpela man. Ol manki ol i no aninit long lo, ol i ausait long lo. Olsem na ol i no gat rait.

Long PNG ol pikinini i no mas wok tru. Ol i save helpim papamama tasol long laik bilong ol. Long sampela provins ol yangpela pipel i no marit yet, ol i no mas wok. Ol i go airaun tasol. Bihain ol i marit, bai ol i wok.

Olsem, wantaim moa ol pikinini long PNG ol i laki tru. Papamama i wari long ol, ol wanfamili i wari long ol. Long dispela kantri i no gat wanpela pikinini i wanpis tru. Long sampela arapela kantri ol i gat bikpela haus we ol i bungim ol pikinini i no gat papamama. Long planti arapela kantri, nogat. Wan wan i mas lukautim em yet, olsem bikpela man tru. Olsem na planti i painim trabel-ol i hangre, i no gat haus, i no gat pren. Na em i no stret.

Poto long raithan i soim wanpela liklik Hailans boi i lain long brukim graun long gaden. Poto i kam long Pater J. Jurczykga, S.V.D.



WINIM MANI ISI TRU

Mipela i laik baim olupela taia.

Wanpela man bilong makim kampani bilong mipela bai raun long olgeta biktaun bilong PNG. Sapos yu bin bungim planti olupela taia, yu rait o ring na tokim mipela, yu stap we, na mipela i ken painim we ol dispela taia, bai mipela i kam kisim na givim mani long yu.

Man bilong makim mipela bai baim long mani stret, olkain olupela taia mipela inap fiksिम gen long faktori bilong mipela long Lae.



Air Corps Road
(klostu long maket)

Box 1298
LAE

Ring: 42.1322 42.1727
42.1698
42.2858 (bihain long wok)

Nesenel komisin bilong

via bilong pikinini

Long Port Moresby wanpela lain pipel i bin kamapim nesanel komisin bilong stiaim olgeta kain wok bilong mekim go het dispela aidia bilong Yunaitet Nesens bilong Pikinini, em 1979 tasol. Long dispela yia yumi mas tingim gut olgeta we bilong helpim ol pikinini long kantri bilong yumi yet. Komisn ya i wokim sampela program bilong PNG nau.

Dispela Nesenel Komiti i gat 11-pela memba bilong em. Hia em i nem bilong sampela: Mis Margret Nakikus (Nesenel Plening Ofis), Mis Audrey Aaros (Yunivesiti), Mista Rod Parris (Famili Plening), Pasto Dick Avi (Melanesian Kaunsil bilong ol Sios), Misis Penny Donald (Wantok Niuspepa), Pasto Bedero Noga (NBC), Mista Godfrey Wipon (Yunaitet Nesens), Mista Larry Avosa (Edukesen Dipatmen), Mista Roger Dickson (Internesenel Skul), Misis Hilan Los (YWCA), Mis Theresa Jula (Port Moresby Siti Kaunsil).

PAS I KAM LONG OL PIPEL

TENKYU LONG SITI KAUNSI

Dia Edita - Hia mi laik tok olsem mi gat bikipela amamas tru long Port Moresby Siti Kaunsi. Long bipo mi save lukim long ol strit na long arere long stua planti pipa i save pulap tru. Na long bikrot tu.

Tasol nau mi lukim Port Moresby em i orait liklik. Tasol planti man na meri yumi save mumutim pipia na save putim long rabis dram.

Na em ol wan wan man-meri long yumi ol i no save harim tok bilong siti kaunsi. Nogat. Ol i save tromoim nbaut na tu mi laikim bai siti kaunsi mas opim ai gut, na lukim wanem man i tromoim pipia, orait, kisim em i go long kot o tokim em i fain long bikipela mani. Em tasol wari bilong mi. Tenkyu.

Anton H.J.

Taurama/Port Moresby.

PASINDIA WANTOK

Dia Edita - Inap yu givim spes long mi long putim liklik wari bilong mi hia long Wantok Niuspepa.

Mi laik bekim toktok bilong, Mista Mark Ipu. Yes, wantok, yu save tritim ol wantok bilong yu. Sapos ol wantok bilong yu i no gat wok, ol i stap pasindia. Yu mas rausim ol i go bek long ples bilong ol.

Ol i stap pasindia long taun. Na ol i save mekim trabel, stil na bagarapim gutpela provins bilong ol wantok. Mi tokim yu ol pipel bilong yu ol nogat

wok, yu mas tokim ol i go i stap long ples, i no ken i stap pasindia tumas long taun. Em tasol.

Mista Lewa Patala,
Porgera/Enga

LARIM WANTOK I STAP

Dia Edita - Wari bilong mi em i go olsem. Mipela wan wan long olgeta provins. Man i stap long hia long Bougainville Kopa na ol wantok bilong mipela i stap long ples. Ol i harim pinis olsem yumi i gat wok pinis long B.C.L. Kampani. Olsem na ol i no wari long kam hia bilong painim wok mani tasol.

Nau ol i kam pinis i stap wantaim mipela long ples we mipela ol wantok i save stap o slip long en. Ol i stap wantaim mipela na mipela i lukautim ol long kaikai na baim ol klos samting bilong em yet. Em mipela ol wantok save sori na mipela save helpim ol na ol i stap gut long olgeta Kem.

Tasol yupela ol Sekuriti i save lukim husat man i no gat wok em i stap long wanpela hap insait long kem em yupela save rausim i go ausait o kisim em i go nating long haus kalabus. Na tu yupela save pinis husat man em i wantok bilong em i gat wok pinis long kampani. Em yupela i no mekim gutpela pasin. Nogat tru.

Sapos yupela lukim wanpela man i mekim trabel insait long kem o brukim haus o glas samting bilong spak tu em i orait long wok bilong yupela ol sekuriti i ken mekim olsem. Tasol man nating i stap gut na kaikai i stap wantaim wantok bilong em. Em yupela save sekap olgeta taim na i no stret.

Yupela ol sekuriti i stap

long olgeta kem insait long BCL, yupela i no bin aplai long wanpela hap na kam hia. Nogat. Bipo taim yu no gat wok. Long dispela taim yu tu pasindia na kisim kaikai long ol wantok, slip long bus tasol nau yu kisim wok pinis ol i makim yu olsem sekuriti yu kamap olsem wanpela saveman na rausim ol wantok bilong mipela long PNG. Em i no stret.

Em tasol wari bilong mi. Sapos husat man i laik sapatim o egensim mi, orait, rait tasol i go long Wantok Niuspepa.

Luis Wasara,
Panguna/Not Solomons

RASKOL BEKIM TOK

Dia Edita - Mipela ol man bilong Hailans i gutpela long mipela kam long Port Moresby. Tasol ol sampela tasol i wok mani na sampela i no gat. Olsem na mipela i ritim niuspepa na harim long nius long redio. Ol i kolim raskol i brukim haus, stua, stilim ka, na kilim ol man na kisim mani bilong ol man i wok mani.

Mipela i amamas long kisim mani bilong ol man. Mipela i askim long wok na ol i no kisim mipela olsem na mipela i harim nius long redio na mipela i bihainim pasin bilong raskol na mipela i kisim bikipela pe long wokim raskol pasin.

Ol man i wok mani tu ol i no kisim bikipela pe na ol i lusim wok mani na ol i kam joinim mipela sampela man. Mipela i no wok mani na wokim raskol pasin na kisim bikipela pe. Na winim pe bilong ol wokman i save kisim.

Sapos olgeta man i wok mani, bai i no inap kamap dispela raskol pasin long Port Moresby. Bai olgeta i stap gut na slip long gutpela haus na raun long gutpela ka.

Ol man i save wok mani na kisim bikipela pe. Ol i save wok mani long mipela Hailans tasol. Mipela Hailans i save i stap long haus tasol na kisim mani bilong ol man i wok mani. Nau mipela i laik olgeta Hailans

tu mas i stap long wok mani.

Musonimo Gomane,
Kabiufa/Goroka.

BLAKSKIN NA RETSKIN

Dia Edita - Mi bilong Not Solomons Provins stret na mi no amamas tru long pasin ol retskin i save mekim. Pasin bilong kilim dai narapela man. Mi les tru long dispela pasin yupela ol retskin i save mekim.

Watpo tru yupela ol retskin i save kilim dai man? Yupela i no ken kisim rabis pasin bilong yupela i kam long Not Solomons. Dispela pasin em i mekim ailan bilong mipela i luk nogut.

Yupela i save Bougainville pipel ol i gutpela pipel tasol. Ol i no save lukim blut i kapsait. Mi yet mi save lukim long taun. Skin ret i kilim skin ret yet, skin ret i kilim blakskin. Tasol blakskin i no save bekim dispela bikos blakskin ol i gutpela man na ol i no save bekim dispela pasin.

Na laik bilong mi i olsem skin ret i mas pinis nau long wokim dispela pasin long kilim dai narapela man. Em i mekim kantri i go daun bek. Kantri i mas gro ap na strong i no ken grop ap long pait.

Em tasol. Tenkyu.

Gideon K. Kumis,
Tinputz/Not Solomons

MASKI OL TOEA TASOL

Dia Edita - Nau long dispela taim mi i gat hap liklik wari bilong mi. Wari bilong mi i go olsem. Taim mi i go baim samting long Supa Maket. Long dispela taim mi wok long painim ol gutpela gutpela klos tasol bilong mi ken karamapim skin na kaikai samting olsem bilong helpim bodi. Tasol pastaim mi laik lukim prais olsem hamas kina na toea long olgeta samting.

Tasol mi lukim sampela kain trasis o klos ol samting em olsem K3.99 na K19.99 o 39 o kain samting olsem i stap long ol

samting mi laik baim long en. Man, mi lukim na tingting bilong mi i no klia tumas. Olsem na mi rait i go long Wantok Niuspepa.

Mi save long pasin bilong ol waitman i save wari*tru long 1 toea o 2 toea o 3 toea o 10 toea, tasol yumi PNG i no save wari long ol dispela olsem na mi les long kisim bek 1 toea. Ol i givim mi bek olsem na yupela i no ken putim pe olsem 99 toea maski putim K1.00. Em inap 1 toea em i no bikipela mani.

Em tasol na yu husat i laik kliaim tingting bilong mi o laik sapatim mi, orait, rait tasol i go long Wantok Niuspepa.

Kukipa Sakape,
Panguna/Not Solomons

AS BILONG WOK PAMUK

Dia Edita - Mi laik sapatim pas bilong tupela wantok ya susa Domabo Sanewi, na brata Kevin Suremo. Tru insait long ol Wantok Niuspepa. Mi save planti toktok long taun, pasin pamuk na sik nogut i save kamap na i bagarapim planti manmeri. Bagarapim laip bilong ol famili.

Tru as i stap long papa na mama. Ol man i laik maritim pikinini meri bilong ol. Askim long marit na papamama na brata bilong meri i tok olsem i laik kisim prais olsem K600 na K700 samting olsem na 5-pela o 6-pela pik. Papamama bilong pikinini i no inap mani na i no inap long pik.

Man i stap nating i go meri i stap nating i go na i tingting nogut i kamap na man i kirap mekim pasin nogut. I no gat we bilong stopim pikinini man na pikinini meri. Na tu ol man i lukim meri i raun tumas ol i no inap maritim em na raun raun i kamap pamuk meri pinis. Na papamama save apim prais i go antap em i go lus nating.

Yu tulet long kisim mani. Sapos yu husat i laik bekim yu ken rait i go long Wantok Niuspepa na mi ken lukim. Tenkyu.

Wilson Tukatuneg,
Kainantu.

BAIM WANTOK

Sapos yu laik kisim Wantok niuspepa olgeta wik inap long wan yia stret, yu salim nem na adres bilong yu wantaim K8.00 i kam long:

WANTOK BOX 1982 BOROKO

Long go long Australia em i K14.00.

Long Yurop na Amerika: K18.20 (long sip)

K 24.00 (long balus)

OL TESTAMEN STORI

SOL I GO KAMAP LONG PLES NA I LUKIM OLGETA MANMERI I BELHEVI NA I KRAI I STAP..

WANEM SAMTING I KAMAP?



YU NO HARIM A? OL AMON I BANISIM JEBES. OL I TOK BAI OL I KAMAUTIM WANPELA AI BILONG OLGETA MAN LONG JEBES.

MASKI. YUMI GO MEKIM SAVE OL, BAI OL I NO INAP MEKIM NOGUT LONG YUMI.



Wanpela Samting I Traim King

1^o Samyuel

9:20 - 11:7


HAP NAMBA TRI:

Stori inap nau...

Samyuel i tokaut long ol pipel olsem: God i bin makim Sol i king bilong ol. Tasol Sol i no tingting planti long dispela na i go bek long ples.

SORI, ATING YUMI NO INAP KISIM OL MAN INAP LONG PAIT LONG OL AMON.

ATING! MI YET MI KING. BAI MI PULIM OL MAN I KAM PAIT.




GIAMAN. HARIM TOK BILONG MAN BILONG MAUSWARA. BAI EM I LUS TRU!



Used by permission of the David C. Cook Foundation. Copyright 1973, David C. Cook Publishing Co. All rights reserved.

WANTOK SPOT PES



PAINIM WANTOK BILONG YU

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.